

**Nunami aalisakkerivinni innaallagissamut, imermullu akikillileruteqartitseriaatsip atuuttup aallarnisaasunut, suliffeqarfinnullu mikinerusunut atuutsilersinneqarneratigut aningaasatigut, allaffissornikkullu kingunissaanik erseqqissaasumik nalunaarusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat aningaasalersueriaatsinik, Inatsisartullu aalajangiinissamut tunngavissaannik ataatsimoortumik imaqassaaq. Nassuiaat kingusinnerpaamik 1. januar 2027-mi Inatsisartunut agguanneqassaaq.**

(Inatsisartunut ilaasortaq Napaartoq Isak Petrussen, Demokraatit)

### **Akissuteqaat**

*(Nunanut allanut, Inuussutissarsiornermut, Aatsitassanullu Naalakkersuisoq)*

### **Siullermeerineq**

Inatsisartunut ilaasortap Napaartoq Isak Petrussen, Demokraatit, siunnersuuteqarneranut Naalakkersuisut sinnerlugit qutsavigaara.

Namminersorlutik inuussutissarsiutilinnik nukittorsaanissaq Kalaallit Nunaata pisariaqartimmagu siammasissumik isumaqatigineqarpoq. Aallarnisaasunut, suliffeqarfinnullu mikinerusunut innaallagissamut, imermullu akikillileruteqartarnissaq soqutiginarpasippoq. Kisiannili sulisaatsimi inuussutissarsiutit pillugit politikkikkut sulisaasiusinnaavoq ajornaatumik sunniutikissinnaalluni akisooq, ersarluttorlu.

Pilersuinerni akikillileruteqariaaseq suliffeqarfiit ingerlatsinermi aningaasartuutaannut tapiissuteqarnerussaaq. Inuussutissarsiutit pillugit politikki eqaatsoq, siumullu isigisoq annertuumik naleqalersitsisinnaasunut piujuartussamik siuarsaanissamik suliniutinut siullertut tapersersuisariaqarpoq. Matumani pingaartumik takornarialerineq, digitaalikkut inuussutissarsiutit, sanaartorneq, isumassuineq aamma avammut tunisassiornerit mikinerusut ilanngullugit,

Innaallagissamut, imermullu nalinginnaasumik akikillileruteqarneq suliffeqarfinnik naleqarnerulersitsinissamut annikitsumik, annertuumillu periarfissallit akornanni immikkoortitsinani sakkussaavoq siammasissoq. Tamanna pillugu inuussutissarsiornikkut ineriartorneq siunnerfilimmik siuarsarnagu. Aningaasat periusissiatigut siunnerfeqanngitsumik atorneqaratarsinnaapput.

Nukissiorfiup aningaasatigut imminut napatittumik, siunissamilu ungasissumi suliffeqarfittut piujuartussatut iluarseeqqinniarniarnermut akikillileruteqariaaseq ajoqusiisoq ajornartorsiutaavoq. Akikillileruteqartariaatsimik aningaasalersuineq Nukissiorfiit aqqutigalugit pissanngikkaluarpoq, nunattali karsiatiguinnaq pisariaqarluni. Nunami aalisakkerivinnut akikillileruteqartariaatsimi misilittakkat ajornartorsiutaasoq takutippaat. 2024-mi akikillilerutigineqartut 43,3 mio. koruuniupput. Tamanna Nukissiorfiit aningaasaqarneranut artukkiinngikkuni atuisunut akissatut qaffasissumik aalajangersakkatigut atuisunut allanut akiligassanngortinneqassalluni.

Tapersiissutitut suliniutit ingerlatseqatigiiffiit nutaat aallartisarnerinut ukkataqarsinnaapput. Ilutigisaanik nioqqutissiornermik, ilaatigullu avammut tunisinermik inuussutissarsiutit pingaarnersiorneqarnissaat isumaliutigissallugu naleqqussinnaavoq. Piffissatigut killeqarneq,

allaffissornikkut pisariineq, tapiissutillu amerlassusissaannut qaffasissusiliineq tamat isiginnissuteqarnerunissamut, siunnerfeqarnerusumillu aaqqiissuteqarnissamut tapertaasinnaapput.

Siuliani allassimasut tunngavigalugit tulluuttumi allannguutissatut siunnersuut Naalakkersuisut inassutigaa:

**Inuussutissarsiutinik siuarsaaneq pillugu periusissiassamik suliaqarnermut atatillugu innaallagissamik, imermillu atuinermut tapiissutinut atatillugu unammillernartut Naalakkersuisut qulaajassagaat kiisalu imminut pilersornerup, tunisassiornerullu annertusineqarnissaat siunertaralugu innaallagissamut, imermullu akikillileruteqartariaatsip inuussutissarsiutit ilaannut atuutsilersinneqarneratigut iluaqtissat, ajoqtissat, kingunissallu misissussagaat pillugu, Inatsisartut aalajangiiffigisassaattut siunnersuut. Qulaajaaneq kingusinnerpaamik 2027-mi aallartinneqassaaq.**

Taamatut oqaaseqarlunga immikkoortup Inatsisartunit oqaluuserineqarnissaanut ingerlateqqippara.